

Morning Dogri (NSD) National News Bulletin 01-06-2024

आकाशवाणी

- लोकसभा दे 7में ते खीरले गेड़ दे चुनां तैहत् 7 राज्यें ते 1 केन्द्र शासत प्रदेश दिएं 57 संसदी सीटें लेई अज्ज वोट पाए जा'रदे न।
- अज्ज होआ करदे मतदान राएं 10 करोड़ 60 लक्ख शा मते मतदाता चुनां मैदान च खड़ोते दे 904 मेदवारें दे सियासी भविक्ख दा फैसला करगंन जिंदे च प्रधानमंत्री नरेन्द्र मोदी ते सूचना ते प्रसारण मंत्री अनुराग सिंह ठाकुर बी शामिल न।
- असम च हाड़ें करी बने दे हालात होर माड़े होई गे न। राज्य दे 11 जिलें च साढ़े 3 लक्ख लोक हाड़ें करी प्रभावत होए न।
- भारती मौसम नै आखेआ ऐ जे हरियाणा, दिल्ली, पंजाब, राजस्थान, उत्तर प्रदेश, ओडिशा, बिहार ते झारखंड च अज्ज बी जबरदस्त गर्मी दा प्रकोप जारी रौहग।
- टमरीकी राष्ट्रपति जो बाइडेन होरें हमास गी आखेआ ऐ जे ओह गाजा च जारी तनाजे गी खत्म करने लेई इजराइल आस्सेआ रखे गेदे नमें प्रस्ताह गी मंजूर करी लै।



7th Phase

लोकसभा चुनां 2024 दे 7में ते खीरले गेड़ दा मतदान अज्ज होआ करदा ऐ। 7 राज्यें ते 1 केन्द्र शासत प्रदेश च फैली दिएं कुल 57 लोकसभा सीटें लेई वोट पाने दी प्रक्रिया बडलै 7 बजे शुरू होई चुकी दी ऐ जेहड़ी संजा 6 बजे तोड़ी चलोग। इस गैह तैहत् 10 करोड़ 60 लक्ख कोला मते मतदाता कुल 904 मेदवारें दे सियासी भविक्ख दा फैसला करगंन। इस गेड़ तैहत् जेहड़ी सीटें लेई वोट पाए जा'रदे न, उंदे च उत्तर प्रदेश ते पंजाब दियां 13—13 सीटां, पच्छिम बंगाल दियां 9, बिहार दियां 8, ओडिशा दियां 6, हिमाचल प्रदेश दियां 4, झारखंड दियां 3 ते केन्द्र शासत प्रदेश चंडीगढ़ दी 1 लोकसभा सीट शामिल ऐ। जेहड़े प्रमुख मेदवारें दा भविक्ख अज्ज दांव पर लग्गे दा ऐ उंदे च प्रधानमंत्री नरेन्द्र मोदी, सूचना ते प्रसारण मंत्री अनुराग सिंह ठाकुर, कांग्रेस दे विक्रमादित्य सिंह ते तृणमूल कांग्रेस दे अभिषेक बेनर्जी बी शामिल न।

मतदान सब्बनें 8एं प्रदेशें च बडलै 7 बजे थमां शुरू होई चुके दा ऐ, जित्थें सुरक्षा दे अलावा मतदाताएं दी सुविधा लेई लोडचदे सब्बै बंदोबस्त कीते गेदे न। पंजाब च मतदाताएं दी गिनतरी 2 करोड़ 11 लक्ख कोला मती ऐ जिंदी सहूलत लेई 24 ज्हार 451 मतदान केन्द्र बनाए गेदे न। ओडिशा च 6 लोकसभा सीटें दे अलावा 42 असेंबली सीटें लेई बी वोट पोआए जा करदे न। गर्मी गी दिक्खदे होई मतदान केन्द्रें पर विशेष प्रबंध कीते गेदे न। बिहार च बी मतदान पूरी चाल्ली रमानदारी ते बवस्था आले ढंगै सिर जारी ऐ। पच्छिम बंगाल, झारखंड, हिमाचल प्रदेश ते चंडीगढ़ थमां बी मतदान केन्द्रें पर मतदाताएं दियां लम्मियां—लम्मियां रीगां लग्गी दियां होने दे समाचार हासल होआ करदे न। लोक बड़े जोश कन्नै अपने लोकतांत्रिक अधिकार दा इस्तेमाल करने लेई अपनी अपनी बारी गी बलगा करदे न।



WHO

बैंगलुरु च मासिक स्वास्थ्य ते तंत्रिका सरबंधी विज्ञान दे राष्ट्रीय संस्थान गी विश्व स्वास्थ्य संगठन WHO आस्सेआ 2024 ब'रे दा स्वास्थ्य गी बढ़ावा देने लेई नैलसन मंडेला सम्मान दित्ता गेआ ऐ। स्वास्थ्य ते परिवार कल्याण मंत्रालय तैहत इस संस्थान दी महत्ता ऐ। केन्द्रीय स्वास्थ्य मंत्री डॉ. मनसुख मांडवीया होरें संस्थान गी ममारकबाद दित्तियां न ते आखेआ जे पूरी पराती स्वास्थ्य संभाल च भारत दे प्रयासें दी पंछान ऐ। केन्द्रीय स्वास्थ्य सचिव अर्पूवा चन्द्रा होरें बी संस्थान गी ममारकबाद दित्तियां ते मानसिक स्वास्थ्य दे क्षेत्र च भारत दे प्रयासें ते खास तौरे दे कम्में दी पंछान उप्पर खुशी प्रगट कीती। ध्यानजोग ऐ जे 2019 च WHO आस्सेआ स्वास्थ्य गी बढ़ावा देने लेई नैलसन मंडेला सम्मान शुरू कीता गेआ, जिस च इक्कले, संस्थाने, सरकारी जां गैर सरकारी संगठनें गी स्वास्थ्य गी बढ़ावा देने लेई एह सम्मान दित्ता जंदा ऐ।



Assam Flood

असम च हाड़ करी पैदा होए दे हालात होर खराब होई गे न, जेह्दे चलदे 6 लोकें दी मौत होई गई ऐ। चक्रवाती तूफान रेमल दे बाद लगातार बरखा करी प्रमुख नदिएं दा जल—स्तर बधने कन्नै 11 जिलें च तकरीबन साढ़े 3 लक्ख लोक प्रभावत होए न।

राज्य भरै च हाड़ करी 560 ग्रां प्रीावत होए न ते 4 जहार 900 हैक्टर थमां मती राई-बाई आली जिमीं गी नुक्सान पुज्जा ऐ। कद्दार च 3, हैलाकांडी च 2 ते पच्छमी कारबी आंगलोग जिले चव्यक्ति दी मौत होई ऐ। असम दे राज्य आपदा प्रबंधन प्राधिकरण मूजब केई जिले च हाड़ दे पानी करी केई शिड़के ते होरने बुनियादी ढांचे गी नुक्सान पुज्जा ऐ। कद्दार, करीमगंज ते नोगांव सब्बने शा मते प्रीावत जिले च। राज्य सरकारै हाड़ेंदी मारै हेठ आए दे जिले च 148 राहत शिविर ते 59 राहत समग्री दी बंड आले केन्द्र खोले गे न। राहत ते बचाह अभियाने लेई एनडीआरएफ ते एसडीआरएफ दिएं टीमें गी तैनात कीता गेदा ऐ।

<><><><><><>

IMD

भारती मौसम विभाग नै उत्तर-दक्खन, मध्य ते पूर्वी भारत च इसलै चला'रदी गर्मी दी लैहर आले हालात थमां अगले दऊं दिनें दरान बल्ले-बल्ले घट्ट होने दी पेशगोई कीती ऐ। मौसम विभाग नै आखेआ जे अज्ज हरियाणा, दिल्ली, पंजाब, राजस्थान, उत्तर प्रदेश, ओडिशा, बिहार ते झारखंड दे किश हिस्सें च गम्भी दी लैहर थमां मती गै गर्म हवाएं दी बी पेशगोई कीती ऐ। इयै नेह् हालात अज्ज मध्यप्रदेश, झत्तीसगढ़, उत्तराखंड ते आंध्रप्रदेश च बी जारी रौहगन। मौसम विभाग दे मूजब अगले दऊं दिनें दरान उत्तर-पच्छम ते मध्य भारत च बद्धोबद्ध तापमान 2 शा 3 डिग्री सैल्सियस हेठ औने ते पूर्वी भारत च 3 शा 4 डिग्री सैल्सियस तापमान दे हेठ औने दी बी मेद ऐ। मौसम सरबंधी अर्जेसिएं नै अगले 6 दिनें दरान उत्तर पूर्वी भारत ते पच्छम बंगाल च हल्की थमां मजाटले दर्जे दी बरखे दी पेशगोई कीती ऐ। इयै नेह् हालात अगले चऊं दिनें दरान बिहार, झारखंड, ओडिशा ते छत्तीसगढ़ च रौहने दी मेद ऐ। दक्खन भारत च इयै ने मौसम दे हालात केरल, लक्षद्वीप, कर्नाटक ते अंडेमान ते निकोबार द्वीप समूह च बी अगले 6 दिनें दरान रौहने दे इमकान ऐ। उत्तर भारत च अगले 5एं दिनें दरान जम्मू कश्मीर, लद्दाख, हिमाचल प्रदेश ते उत्तराखंड च बरखा ते शमानी बिजली दी बी पेशगोई कीती गेई ऐ।

<><><><><><>

Pakistan-POK

पाकिस्तान दी सरकारै इस्लामाबाद हाईकोर्ट च एह स्वीकार कीता ऐ जे पाकिस्तान दे कब्जे आला कश्मीर विदेशी इलाका ऐ। पाकिस्तान दे अपर अटॉर्नी जनरल होरें अदालत गी दस्सेआ जे कश्मीरी शायर ते पत्रकार अहमद फरहद शाह, पाकिस्तान दे कब्जे आले कश्मीर च पुलस दी हिरासत च न ते उनेंगी इस्लामाबाद हाई कोर्ट च पेश नेई कीता जाई सकदा की जे पाकिस्तान दे कब्जे आला इलाका विदेशी सर-जमीन ऐ जेहड़ी पाकिस्तान दे अधिकार-क्षेत्र हेठ नेई आँदा। अदालत च शाह दी घरै आली दी याचिका पर सुनवाई होआ करदी ही। पाकिस्तान दी खुफिया अर्जेसिएं रावलपिंडी च शाह होरें गी उंदे घरै थमां अगवाह करी लैता हा। इस्लामाबाद हाई कोर्ट नै आला कश्मीर जेकर विदेशी इलाका ऐ ते ओह जेकर पाकिस्तान दा हिस्सा नेई ऐ तां पाकिस्तानी रेंजर ते फौज उत्थें कियां पुज्जी गे।



RBI-Gold

भारतीय रिजर्व बैंक नै बरतानिया थमां इक सौ टन कोला मता अपना सुन्ना वापस भारत लेई आंदा ऐ। एह केन्द्री बैंक दी आर्थिक नीति च इक बड्डा बदलाव ऐ। एहदे नै भारत दी आर्थिक सम्प्रभुता ते कुलसंसारी बजार पर बी महत्वपूर्ण असर पौग। दुनिया दे ज्यादातर मुख्य अपना सुन्ना बैंक ऑफ इंग्लैंड जां ऐसे कुसै होर मुखे च जमा रखदे न। एहदे लेई उनेंगी बकायदा इक फीस दा भुगतान बी करना पौंदा ऐ। मजूदा समें च भारत कश 11 म्हीने दे आयात लेई सुद्धा विदेशी मुद्रा भंडार ऐ। इस ब'रे 31 मार्च तगर भारतीय रिजर्व बैंक कश कुल 822 मीट्रिक टन कोला मता सुन्ना जमा हा।



US President

अमरीका दे राष्ट्रपति जो बाइडेन होरें हमास गी इजराइल दे नमें प्रस्ताव गी मन्नने दी गुजारिश कीती तां जे गाजा च तनोतनी खत्म होई जा। एह प्रस्ताह त्रै हिस्से च होग जिस राएं गोजा दे रिहायशी इलाकें थमां इजराइल अपने रक्षा बलें गी वापस परतोग जेहड़ जे 6 हफते दे संघर्ष विराम कन्नै शुक्य होग। एहदे च मानवी मदाद गी बढ़ावा देना ते कन्नै गै फिलिस्तीन कैदिएं दे बदले इजराइल बंधकें दी बदला बदली बी शामिल ऐ।

इस प्रस्ताह कन्नै दुश्मनें दे पूरी चाल्ली स्वतंत्रता ते गाजा च पूर्णनिर्माण योजना बी शामिल ऐ। अमरीका दे राष्ट्रपति होरें आखेआ जे तनोतनी गी खत्म करने दा एह इक बेहतरिन तरीका ऐ। इक ब्यान च इजराइल दे प्रधानमंत्री बेनजुमिन नेतान्यू होरें आखेआ जे युद्ध अदूं तगर खत्म नेई होग जदूं तगर सब्बै बंधकें गी वापस नेई आन्नेआ जाग ते हमास दे फौजी ते सरकारी क्षमताएं गी खत्म नेई कीता जाग। उनें आखेआ जे ताजा तरीन योजना कन्नै इजराइल इनें सिद्धांतें गी कायम रखी सकोग।

<><><><><><>